

四庫全書

集部

欽定四庫全書

集部

古今詩刪卷二

四

詳校官中書_臣李采

侍讀_臣孫球覆勘

總校官庶吉士_臣倉聖脉

校對官待詔_臣胡士震

謄錄監生_臣莊承簪

欽定四庫全書

集部八

古今詩刪

總集類

提要

臣等謹案古今詩刪三十四卷明李攀龍編

攀龍有滄溟集別著錄是編為所錄歷代之詩每代各自分體始於古逸次以漢魏南北朝次以唐唐之後繼以明多錄同時諸人之作而不及宋元蓋自李夢陽倡不讀唐以後

書之說前後七子率以此論相尚攀龍是選
猶是志也昔江淹作雜擬詩上自漢京下至
齊代古今咸列正變不遺其序有曰蛾眉詎
同貌而俱動於魄芳草寧共氣而皆悅於魂
又曰世之諸賢各滯所迷莫不論甘而忌辛
好丹而非素豈所謂通方廣恕好遠兼愛然
則文章派別不主一途但可以工拙為程未
容以時代為限宋詩導黃陳之派多生硬杈

極元詩沿溫李之波多綺靡婉弱論其流弊
誠亦多端然鉅製鴻篇實不勝數何容刪除
兩代等之自鄒無譏王士禎論詩絕句有曰
鐵崖樂府氣淋漓淵穎歌行格儘奇耳食紛
紛說開寶幾人眼見宋元詩其殆為夢陽輩
發歟且以此選所錄而論唐末之韋莊李建
勳距宋初閱歲無多明初之劉基梁寅在元
末吟篇不少何以數年之內今古頓殊一人

之身薰蕕互異此直門戶之見入主出奴不
緣真有限斷厥後周亮工鐫一私印文曰不
讀王李鍾譚之詩載於賴古堂譜中豈非高
談盛氣有以激之遂至出爾反爾乎然明季
論詩之黨判於七子七子論詩之旨不外此
編錄而存之亦足以見風會變遷之故是非
蜂起之由未可廢也流俗所行別有攀龍唐
詩選攀龍實無是書乃明末坊賈割出詩刪

中唐詩加以評註別立斯名以其流傳既久
今亦別存其目而不錄其書焉乾隆四十三年
九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

卷八

提要

古今詩刪原序

李攀龍于鱗所為古今詩刪成凡數年而歿歿而新都汪時元謀梓之走數千里以序屬世貞曰是唯二君子之有味乎詩也不有存者誰與任歿者世貞謝不敏已喟然而嘆曰嗟嗟否歟然哉蓋孔子嘗稱刪詩書云至筆削春秋取獨斷其於詩也未嘗不退而與游夏商之也當三代盛時國中之樂奏而暢天地之和歌詠盛德

欽定四庫全書

古今詩刪
原序

大業合而名之曰雅頌野之人人違其觸發而名之若青蘋之末而動於地曰風顧其循性蓄旨雍如穆如則亦雅頌類也三代而降天下多感慨而鮮稱述故詩在下而不在上蓋風之用廣而雅頌微矣夫子寔傷之故稱刪刪者刪其不正以歸乎正也乃說者謂一二逸詩豈無可當於德音而鄭衛哇麗淫佚誦而使君子噦之小夫士人以其說津津於其口懲者一而尊者十烏能無疑刪哉夫豈亦秦火厄魯壁訛毛萇轅固生之徒不能親受游夏之旨而漫為說也乃于鱗之為刪則異是

彼其所上下者雖號稱數千年其所近者僅風而已其所近而云雅頌者百固不能一二也而于鱗之所取則亦以能工於辭不悖其體而已非必盡合于古所謂發乎情止乎禮義興觀羣怨之用備而後謂之詩也是故存詩而曰刪曰刪者刪之餘也為若不得已而存也夫以孔子之於詩猶不能廢游夏而于鱗取其獨見而裁之而遽命之曰刪彼其見刪於于鱗而不自甘者寧無

欽定四庫全書

古今詩刪
原序

二

反脣也雖然令于鱗以意而輕退古之作者間有之于
鱗合格而輕進古之作者則無是也以于鱗之母輕進
其得存而成一家言以模楷後之操觚者亦庶乎可矣
蓋于鱗之所最善為世貞其屬存于鱗刪者不少然自
戊午而前及它倡和之什耳其人雅自信落落寡與家
僻處濟上則于鱗之于今賢士大夫多所與而少所見
可知也問為繼于鱗志者如之何曰代益之不失所以
精之意而已矣友人吳郡王世貞撰

欽定四庫全書

古今詩刪卷一

明 李攀龍 編

古逸

商銘 商王

嘽嘽之德不足就也不可以矜而祇取憂叶也嘽嘽之
食不足徂也不能為膏而祇離咎也

盥盤銘 武王

與其溺於人也寧溺於淵叶溺於淵猶可游也溺於人
不可救叶也

杖銘 武王

惡乎危於忿戇惡乎失道於嗜慾惡乎相忘於富貴

戶銘 武王

夫名難得而易失無勤弗志而曰我知之乎無勤弗及
而曰我杖之乎擾阻以泥之若風將至必先搖搖叶雖
有聖人不能為謀也

筆銘

武王

毫毛茂茂

叶

陷水可脫陷文不活

書車

武王

自致者急載人者緩取欲無度自致而反

金人銘

武王

古之慎言人也戒之哉無多言多言多敗無多事多事多患安樂必戒無行所悔勿謂何傷其禍將長勿謂何害其禍將大勿謂不聞神將伺人焰焰不滅炎炎若何

涓涓不壅終為江河綿綿不絕或成網羅毫末不札將
尋斧柯誠能慎之福之根也口是何傷禍之門也強梁
者不得其死好勝者必遇其敵盜憎主人民怨其上君
子知天下之不可上也故下^叶之知衆人之不可先也
故後^叶之溫恭慎德使人慕之執雌持下人莫踰之人
皆趨彼我獨守此人皆惑之我獨不徙內藏我知不示
人技我雖尊高人莫我害江海雖左長于百川以其卑
也天道無親常與善人戒之哉

鼎銘 正考父

一命而僂再命而偃三命而俯循牆而走 叶 亦莫余敢

侮饘於是粥於是 是以餬余口 叶

轡之柔矣 太子晉

馬之剛矣轡之柔矣馬亦不剛轡亦不柔志氣麤麤 叶

取與不疑 叶

引古語 鄒衍

截趾適履孰云其愚何與斯人追欲喪軀

堯戒

淮南子

戰戰慄慄日謹一日人莫躋於山而躋於垤

叶

鼓缶

淮南子

君子有酒小人鼓缶雖不見好亦不見醜

烏鵲歌二首

韓馮妻何氏

南山有烏北山張羅烏自高飛羅當奈何

其二

烏鵲雙飛不樂鳳凰妾是庶人不樂宋王

松栢歌

齊人

松栢栢邪佳建共者客邪

渡易水歌

荆軻

風蕭蕭兮易水寒

叶

壯士一去兮不復還

叶

垓下歌

項羽

力拔山兮氣蓋世時不利兮騅不逝
騅不逝兮可奈何
虞兮虞兮奈若何

古今詩刪卷一

欽定四庫全書

古今詩刪卷二

明 李攀龍 編

漢樂府

大風歌 高帝

大風起兮雲飛揚
威加海內兮歸故鄉
安得猛士兮守四方

鴻鵠歌 高帝

鴻鵠高飛一舉千里羽翼已就橫絕四海橫絕四海又
可奈何雖有矰繳將安所施

秋風辭

武帝

秋風起兮白雲飛草木黃落兮鴈南歸蘭有秀兮菊有
芳懷佳人兮不能忘汎樓船兮濟汾河橫中流兮揚素
波簫鼓鳴兮發擢歌懽樂極兮哀情多少壯幾時兮奈
老何

李夫人歌

武帝

是邪非邪立而望之翩何姍姍其來遲

歌 李延年

北方有佳人絕世而獨立一顧傾人城再顧傾人國寧
不知傾城與傾國佳人難再得

怨歌行 班婕妤

新裂齊紈素皎潔如霜雪裁為合歡扇團團似明月出
入君懷袖動搖微風發常恐秋節至涼飈奪炎熱棄捐
篋笥中恩情中道絕

白頭吟

卓文君

皚如山上雪皎若雲間月聞君有兩意故來相決絕今
日斗酒會明旦溝水頭躑躑御溝上溝水東西流淒淒
復淒淒嫁娶不須啼願得一心人白頭不相離竹竿何
嫋嫋魚尾何簩簩男兒重意氣何用錢刀為

飲馬長城窟行

蔡邕

青青河邊草綿綿思遠道遠道不可思宿昔夢見之夢
見在我傍忽覺在他鄉他鄉各異縣展轉不可見枯桑

知天風海水知天寒八門各自媚誰肯相為言客從遠
方來遺我雙鯉魚呼童烹鯉魚中有尺素書長跪讀素
書書中竟何如上有加餐食下有長相憶

羽林郎

辛延年

昔有霍家奴姓馮名子都依倚將軍勢調笑酒家胡胡
姬年十五春日獨當爐長裾連理帶廣袖合歡襦頭上
藍田玉耳後大秦珠兩環何窈窕一世良所無一鬟五
百萬兩鬟千萬餘不意金吾子娉婷過我廬銀鞍何煜

燭翠蓋空踟躕就我求清酒絲繩提玉壺就我求珍肴
金盤鱠鯉魚貽我青銅鏡結我紅羅裾不惜紅羅裂何
論輕賤軀男兒愛後婦女子重前夫人生有新故貴賤
不相踰多謝金吾子私恩徒區區

董嬌嬈

宋子侯

洛陽城東路桃李生路傍花花自相對葉葉自相當春
風東北起花葉正低昂不知誰家子提籠行採桑纖手
折其枝花落何飄颻請謝彼姝子何為見損傷高秋八

九月白露變為霜終年會飄墮安得久馨香秋時自零落春月復芬芳何時盛年去懽愛永相忘吾欲竟此曲此曲愁人腸歸來酌美酒挾瑟上高堂

古怨歌

竇玄妻

笄笄白兔東走西顧衣不如新人不如故

戰城南

無名氏

戰城南死郭北野死不葬烏可食為我謂烏且為客豪野死諒不葬腐肉安能去子逃水深激激蒲葦冥冥梟

騎戰鬪死駕馬徘徊鳴梁築室何以南何以北未黍不
獲君何食願為忠臣安可得思子良臣良臣誠可思朝
行出攻暮不夜歸

上陵

無名氏

上陵何美美下津風以寒問客從何來言從水中央桂
樹為君船青絲為君竿木蘭為君櫂黃金錯其間滄海
之雀赤翅鴻白鴈隨山林乍開乍合曾不知日月明醴
泉之水光澤何蔚蔚芝為車龍為馬覽遨遊四海外甘

露初二年芝生銅池中仙人下來飲延壽千萬歲

有所思

無名氏

有所思乃在大海南何用問遺君雙珠玳瑁簪用玉紹
繚之聞君有他心拉雜摧燒之摧燒之當風揚其灰從
今已往勿復相思相思與君絕雞鳴狗吠兄嫂當知之
妃呼狝秋風肅肅晨風颼東方須臾高知之

臨高臺

無名氏

臨高臺以軒下有清水清且寒江有香草目以蘭黃鵠

高飛離哉翻關弓射鵠令我主壽萬年收中吾

烏生
無名氏

烏生八九子端坐秦氏桂樹間
惜我秦氏家有遊遨蕩
子工用睢陽彊蘇合彈
左手持彊彈兩丸出入烏東西
惜我一丸即發中烏身
烏死魂魄飛揚上天阿母生烏
子時乃在南山巖石間
惜我人民安知烏子處
蹊徑窈窕安從通
白鹿乃在上林西苑中
射工尚復得白鹿脯
惜我黃鵠摩天極
高飛後宮尚復得烹煮之鯉魚
乃在

洛水深淵中釣釣尚得鯉魚口
惜我人民生各各有壽命
死生何須復道前後

陌上桑

無名氏

日出東南隅照我秦氏樓
秦氏有好女自名為羅敷
羅敷善蠶桑採桑城南隅
青絲為籠係桂枝為籠鉤
頭上倭墮髻耳中明月珠
綳綺為下裙紫綺為上襦
行者見羅敷下擔捋髭鬚
少年見羅敷脫帽著幘頭
耕者忘其犁鋤者忘其鋤
來歸相怨怨但坐觀羅敷

一使君從南解

來五馬立踟躕使君遣吏往問是誰家姝秦氏有好女
自名為羅敷羅敷年幾何二十尚不足十五頗有餘使
君謝羅敷寧可共載不羅敷前致辭使君一何愚使君
自有婦羅敷自有夫

二解

東方千餘騎夫婿居上頭何用

識夫婿白馬從驪駒青絲係馬尾黃金絡馬頭腰中鹿
盧劍可值千萬餘十五府小史二十朝大夫三十侍中
郎四十專城居為人潔白皙鬢鬢頗有鬚盈盈公府步
冉冉府中趨坐中數千人皆言夫婿殊

三解

長歌行三首

無名氏

青青園中葵朝露待日晞陽春布德澤萬物生光輝常
恐秋節至焜黃華葉衰百川東到海何時復西歸少壯
不努力老大徒傷悲

其二

仙人騎白鹿髮短耳何長導我上太華攬芝獲赤幢來
到主人門奉藥一玉箱主人服此藥身體日康彊髮白
復更黑延年壽命長

其三

岌岌山上亭皎皎雲間星遠望使心思遊子戀所生驅
車出北門遙觀洛陽城凱風吹長棘天天枝葉傾黃鳥
飛相追咬咬弄音聲佇立望西河泣下沾羅纓

君子行

無名氏

君子防未然不處嫌疑間瓜田不納履李下不正冠嫂
叔不親授長幼不比肩勞謙得其柄和光甚獨難周公
下白屋吐哺不及餐一沐三握髮後世稱聖賢

董逃行

無名氏

吾欲上謁從高山山頭危險道路難遙望五嶽端黃金

為闕班璘但見芝草葉落紛紛解一百鳥集來如煙山獸

紛紛麟辟邪其端鷄雞聲鳴但見山獸援戲相拘攀解二

小復前行玉堂未心懷流還傳教出門來門外人何求

所言欲從聖道求一得命延解三教救凡吏受言採取神

藥若木端玉兔長跪擣藥蝦蟇丸奉上陛下下一玉杵服

此藥可得神仙解四服爾神藥莫不歡喜陛下長生老壽

四面肅肅稽首天神擁護左右陛下長與天相保守

解五

相逢行

無名氏

相逢狹路間道隘不容車不知何年少夾轂問君家君
家誠易知易知復難忘黃金為君門白玉為君堂堂上
置樽酒作使邯鄲倡中庭生桂樹華燈何煌煌兄弟兩
三人中子為侍郎五日一來歸道上自生光黃金絡馬
頭觀者盈道傍入門時左顧但見雙鴛鴦鴛鴦七十二
羅列自成行音聲何嚶嚶鶴鳴東西廂大婦織綺羅中

婦織流黃小婦無所為挾瑟上高堂大人且安坐調絲
方未央

隴西行

無名氏

天上何所有歷歷種白榆桂樹夾道生青龍對道隅鳳
凰鳴啾啾一母將九雛顧視世間人為樂甚獨殊好婦
出迎客顏色正敷愉伸腰再拜跪問客平安不請客北
堂上坐客氍毹氍毹清白各異樽酒上正華疏酌酒持與
客客言主人持却畧再拜跪然後持一杯談笑未及竟

左顧敕中廚促令辦麤飯慎莫使稽留廢禮送客出盈
盈府中趨送客亦不遠足不過門樞取婦得如此齊姜
亦不如健婦持門戶亦勝一丈夫

折楊柳行

無名氏

默默施行違厥罰隨事來來喜殺龍逢桀放於鳴條

解一

祖伊言不用紂頭懸白旄指鹿用為馬胡亥以喪軀

解二

夫差臨命絕乃云負子胥戎王納女樂以亡其由余璧

馬禍及號二國俱為墟

解三

三夫成市虎慈母投杼趨卞

和之則足接輿歸草廬

解四

東門行

無名氏

出東門不顧歸來入門悵欲悲盜中無斗儲還視桁上

無懸衣

解一

拔劍出門去兒女牽衣啼他家但願富貴賤

妾與君共鋪糜

解二

共鋪糜上用滄浪天故下為黃口小

兒今時清廉難犯教言君復自愛莫為非

解三

今時清廉

難犯教言君復自愛莫為非行吾去為遲平慎行望君

歸

解四

婦病行

無名氏

婦病連年累歲傳呼丈人前一言當言未及得言不知
淚下一何翩翩屬累君兩三孤子莫我兒飢且寒有過
慎莫笄笞行當折挫思復念之亂曰抱時無衣襦復無
裏閉門塞牖舍孤兒到市道逢親交泣坐不能起從乞
求與孤買餌對交啼泣淚不可止我欲不傷悲不能已
探懷中錢持授交入門見孤啼索其母抱徘徊空舍中
行復爾耳棄置勿復道

孤兒行

無名氏

孤兒生孤兒遇生命獨當苦父母在時乘堅車駕駟馬
父母已去兄嫂令我行賈南到九江東到齊與魯臘月
來歸不敢自言苦頭多蟣虱面目多塵大兄言辦飯大
嫂言視馬上高堂行取殿下堂孤兒淚下如雨使我朝
行沒暮得水來歸手為錯足下無菲愴愴履霜中多疾
藜拔斷蒺藜腸月中愴欲悲淚下漑漑清涕纍纍冬無
複襦夏無單衣居生不樂不如早去下從地下黃泉春

風動草萌芽三月蠶桑六月收瓜將是瓜車來到還家
瓜車反覆助我者少嗚瓜者多願還我蒂獨且急歸尤
與嫂嚴當與校計亂曰里中一何譏譏願欲寄尺書將
與地下父母兄嫂難與久居

豔歌何嘗行二首

無名氏

飛來雙白鵠乃從西北方十五五羅列成行妻卒被
病行不能相隨五里一返顧六里一徘徊吾欲銜汝去
口噤不能開吾欲負汝去毛羽何摧頽樂哉新相知憂

來生別離踏躋顧羣侶淚下不自知

其二

念與君離別氣結不能言
各各重自愛遠道歸還難
妾當守空房閉門下重關
若生當相見亡者會黃泉
今日樂相樂萬歲期延年

豔歌行二首

無名氏

翩翩堂前燕冬藏夏亦見
兄弟兩三人流蕩在他縣
故衣誰當補新衣誰當綻
賴得賢主人覽取為吾組
夫壻

金匱要略卷二
從門來斜倚西北盼語卿且勿盼水清石自見石見何
纍纍遠行不如歸

其二

南山石鬼鬼松栢何離離上枝拂青雲中心十數圍洛
陽發中梁松栢竊自悲斧鋸截是松松樹東西摧持作
四輪車載至洛陽宮觀言莫不歎問是何山材誰能刻
鏤此公輸與魯班被之用丹漆薰用蘇合香本是南山
松今為宮殿梁

滿歌行

無名氏

為樂未幾時遭世險巖逢此百罹零丁荼毒愁懣難支

遙望辰極天曉月移憂來填心誰當我知

解一

戚戚多思

慮耿耿不寧禍福無形唯念古人遜位躬耕遂我所願

以茲自寧自鄙山棲守此一榮

解二

暮秋烈風起西蹈滄

海心不能安攬衣起瞻夜北斗闌干星漢照我去去自

無他奉事二親勞心可言

解三

窮達天所為智者不愁多

為少憂安貧樂正道師彼莊周遺名者貴子熙同巖往

者二賢名垂千秋

解四

飲酒歌舞不樂何須善哉照觀日

月日月馳驅軼軻世間何有何無貪財惜費此一何愚
命如鑿石見火居世竟能幾時但當歡樂自娛盡心極
所嬉怡安善養君德性百年保此期願

解五

淮南王篇

無名氏

淮南王自言尊百尺高樓與天連後園鑿井銀作牀金
瓶素綆汲寒漿汲寒漿飲少年少年窈窕何能賢揚聲
悲歌音絕天我欲渡河河無梁願化雙黃鵠還故鄉還

故鄉入故里徘徊故鄉苦身不已繁舞寄聲無不泰徘徊桑梓游天外

傷歌行

無名氏

昭昭素明月輝光燭我牀憂人不能寐耿耿夜何長微風吹閨闥羅帷自飄揚攬衣曳長帶屣履下高堂東西安所之徘徊以傍徨春鳥翻南飛翩翩獨翱翔悲聲命儔匹哀鳴傷我腸感物懷所思泣涕忽沾裳佇立吐高吟舒憤訴穹蒼

悲歌

無名氏

悲歌可以當泣遠望可以當歸思念故鄉鬱鬱累累欲
歸家無人欲渡河無船心思不能言腸中車輪轉

前緩聲歌

無名氏

水中之鳥必有陸地之船但有意氣不能自前心非木
石荊根株數得復葢天當復思東流之水必有西上之
魚不在大小但有朝於復來長笛續短笛欲今皇帝陛
下三千萬

上留田行

無名氏

里中有啼兒似類親父子回車問啼兒慷慨不可止

古八變歌

無名氏

北風初秋至吹我章華臺浮雲多暮色似從崦嵫來枯
桑鳴中林絡緯響空階翩翩飛蓬征愴愴游子懷故鄉
不可見長望始此回

古歌

無名氏

上金殿著玉樽延賓客入金門入金門上金堂東廚具

有膳椎牛烹猪羊主人前進酒彈瑟為清商投壺對彈
棊博奕並復行朱火颺煙霧博山吐微香清樽發朱顏
四坐樂且康今日樂相樂延年壽千霜

古歌

無名氏

秋風蕭蕭愁殺人出亦愁入亦愁座中何人誰不懷憂
令我白頭胡地多颺風樹木何脩脩離家日趨遠衣帶
日趨緩心思不能言腸中車輪轉

古歌銅雀詞

長安城西雙員闕上有一雙銅雀宿一鳴五谷生再鳴
五穀熟

古今詩刪卷二

欽定四庫全書

古今詩刪卷三

明 李攀龍 編

魏樂府

短歌行二首

武帝

對酒當歌人生幾何譬如朝露去日苦多慨當以慷憂
思難忘何以解憂唯有杜康青青子衿悠悠我心但為
君故沈吟至今呦呦鹿鳴食野之苹我有嘉賓鼓瑟吹

笙明明如月何時可掇憂從中來不可斷絕越陌度阡
枉用相存契濶談讌心念舊恩月明星稀烏鵲南飛繞
樹三匝何枝可依山不厭高海不厭深周公吐哺天下
歸心

其二

周西伯昌懷此聖德五分天下而有其二脩奉貢獻臣
節不墜崇侯讒之是以拘繫後見赦原賜之斧鉞得使
征伐為仲尼所稱逮及德行猶奉事殷論敘其美齊桓

之功為霸之首九合諸侯一匡天下一匡天下不以兵
車正而不謫其德傳稱孔子所嘆並稱夷吾民受其恩
賜與廟胙命無下拜小白不敢爾天威在顏咫尺晉丈
亦霸躬奉天王受賜珪瓚鉅鬯彤弓盧弓矢千虎賁三
百人威服諸侯師之者尊八方聞之名亞齊桓河陽之
會詐稱周王是以其名紛葩

凡六解

碣石篇

武帝

東臨碣石以觀滄海水何澹澹山島竦峙樹木叢生百

草豐茂秋風蕭瑟洪波湧起日月之行若出其中星漢
燦爛若出其裏幸甚至哉歌以詠志

龜雖壽

武帝

神龜雖壽猶有竟時騰蛇乘霧終為土灰老驥伏櫪志
在千里烈士暮年壯心不已盈縮之期不但在天養怡
之福可得永年幸甚至哉歌以詠志

蒿里曲

武帝

關東有義士興兵討羣凶初期會盟津乃心在咸陽軍

合力不齊躊躇而鴈行勢利使人爭嗣還自相戕淮南
弟稱號刻璽於北方鎧甲生蟣虱萬姓以死亡白骨露
於野千里無雞鳴生民百遺一念之斷人腸

苦寒行

武帝

北上太行山艱哉何巍巍羊腸阪詰屈車輪為之摧樹
木何蕭瑟北風聲正悲熊羆對我蹲虎豹夾路啼谿谷
少人民雪落何霏霏延頸長歎息遠行多所懷我心何
怫鬱思欲一東歸水深橋梁絕中路正徘徊迷或失故

路薄暮無宿棲行行日已遠人馬同時饑擔囊行取薪
斧水持作糜悲彼東山詩悠悠使我哀

却東西門行

武帝

鴻鴈出塞北乃在無人鄉舉翅萬里餘行止自成行冬
節食南稻春日復北翔田中有轉蓬隨風遠飄揚長與
故根絕萬歲不相當奈何此征夫安得去四方戎馬不
解鞍鎧甲不離傍冉冉老將至何時反故鄉神龍藏深
泉猛獸步高岡狐死歸首丘故鄉安可忘

善哉行三首

文帝

上山採薇薄暮苦饑谿谷多風霜露沾衣

解一

野雉羣雊

猿猴相追還望故鄉鬱何壘壘

解二

高山有崖林木有枝

憂來無方人莫之知

解三

人生如寄多憂何為今我不樂

歲月如馳

解四

湯湯川流中有行舟隨波轉薄有似客游

解五策我良馬被我輕裘載馳載驅聊以忘憂

解六

其二

有美一人婉如青揚妍姿巧笑和媚心腸知音識曲善

卷三
為樂方哀絃微妙清氣含芳流鄭激楚度宮中商感心
動耳綺麗難忘離鳥夕宿在彼中洲延頸鼓翼悲鳴相
求眷然顧之使我心愁嗟爾昔人何以忘憂

其三

朝日樂相樂酣飲不知醉悲絃激新聲長笛吐清氣

解一

絃歌感人腸四座皆歡悅寥寥高堂上涼風入我室

解二

持滿如不盈有德者能卒君子多苦心所愁不但一

解三

慊慊下白屋吐握不可失衆賓飽滿歸主人苦不悉

解四

比翼翔雲漢羅者安所羈冲靜得自然榮華何足為

五解

燕歌行二首

文帝

秋風蕭瑟天氣涼草木搖落露為霜羣燕辭歸鴈南翔
念君客游思斷腸慊慊思歸戀故鄉君何淹留寄他方
賤妾玆玆守空房憂來思君不敢忘不覺淚下沾衣裳
援琴鳴絃發清商短歌微吟不能長明月皎皎照我牀
星漢西流夜未央牽牛織女遙相望爾獨何辜限河梁

其二

別日何易會日難山川悠遠路漫漫鬱陶思君未敢言
寄書浮雲往不還涕零雨面毀容顏誰能懷憂獨不歎
展詩清歌聊自寬樂往哀來摧肺肝耿耿伏枕不能眠
披衣出戶步東西悲風清厲秋氣寒羅幃徐動驚秦軒
仰戴星月觀雲間飛鳥晨鳴聲可憐留連顧懷不自存

豔歌何嘗行

文帝

何嘗快獨無憂但當飲醇酒炙肥牛

解一

長兄為二千石

中兄被貂裘

解二

小弟雖無官爵鞍馬馭馭往來王侯長

者遊

解三

但當在王侯殿上快獨樗蒲六博對坐彈碁

解四

男兒居世各當努力蹙迫日暮殊不久留

解五

少小相觸

抵寒苦長相隨忿恚安足諍吾中道與卿共別離約身

奉事君禮節不可虧上慚滄浪之天下顧黃口小兒奈

何復老心皇皇獨悲誰能知

解六

塘上行

甄皇后

蒲生我池中其葉何離離傍能行仁義莫若妾自知衆
口鑠黃金使君生別離念君去我時獨愁常苦悲想見

君顏色感結傷心脾念君常苦悲夜夜不能寐莫以豪
賢故棄捐素所愛莫以魚肉賤棄捐葱與薤莫以麻枲
賤棄捐菅與蒯出亦復苦愁入亦復苦愁邊地多悲風
樹木何脩脩從軍致獨樂延年壽千秋

權歌行

明帝

王者布大化配乾稽后祇陽育則陰殺晷景應度移
文德以時振武功伐不隨重華舞干戚有苗服從媯
蠢爾吳中虜憑江樓山阻哀哉王士民瞻仰靡依怙

解三

解二

解一

皇上悼愍斯宿昔奮天怒發我許昌宮列舟于長浦

解四

翌日乘波揚棹歌悲且涼太常拂白日旗幟紛設張

解五

將抗旄與鉞耀威於彼方伐罪以弔民清我東南疆

解六

筌篴引 曹植

置酒高殿上親友從我遊中厨辦豐膳烹羊宰肥牛秦
箏何慷慨齊瑟和且柔陽阿奏奇舞京洛出名謳樂飲
過三爵緩帶傾庶羞主稱千金壽賓奉萬年酬久要不
可忘薄終義所尤謙謙君子德磬折欲何求驚風飄白

日光景馳西流盛時不可再百年忽我適生存華屋處
零落歸山丘先民誰不死知命復何憂

怨詩行

曹植

明月照高樓流光正徘徊上有愁思婦悲嘆有餘哀

解一

借問嘆者誰自云蕩子妻夫行踰十載賤妾常獨棲

解二

念君過於渴思君劇於飢君作高山栢妾為濁水泥

解三

北風行蕭蕭烈烈入吾耳心中念故人淚墮不能止

解四

浮沈各異路會合當何諧願作東北風吹我入君懷

解五

君懷常不開賤妾當何依恩情中道絕流止任東西

六解

我欲竟此曲此曲悲且長今日樂相樂別後莫相忘

七解

美女篇

曹植

美女妖且閑採桑岐路間柔條紛冉冉落葉何翩翩攘
袖見素手皓腕約金環頭上金爵釵腰佩翠琅玕明珠
交玉體珊瑚間木難羅衣何飄飄輕裾隨風還顧盼遺
光彩長嘯氣若蘭行徒用息駕休者以忘餐借問女安
居乃在城南端青樓臨大路高門結重關容華耀朝日

誰不希令顏媒氏何所營玉帛不時安佳人慕高義求
賢良獨難衆人徒噉噉安知彼所觀盛年處房室中夜
起長嘆

白馬篇

曹植

白馬飾金羈連翩西北馳借問誰家子幽并游俠兒少
小去鄉邑揚聲沙漠垂宿昔秉良弓楛矢何參差控弦
破左的右發摧月支仰手接飛猱俯身散馬蹄矯捷過
猴猿勇剽若豹螭邊城多警急虜騎數遷移羽檄從北

來厲馬登高隄長驅蹈匈奴左顧陵鮮卑棄身鋒刃端
性命安可懷父母且不顧何言子與妻名在壯士籍不
得中顧私捐驅赴國難視死忽如歸

五遊

曹植

九州不足步願得凌雲翔逍遙八紘外遊目歷遐荒披
我丹霞衣襲我素霓裳華蓋芬晻藹六龍仰天驤曜靈
未移景倏忽造昊蒼閭闔啓丹扉雙闕曜朱光徘徊文
昌殿登陟太微堂上帝休西櫺羣后集東廂帶我瓊瑤

珮漱我沆瀣漿踟躕玩靈芝徙倚弄華芳王子奉仙藥
羨門進奇方服食享遐紀延壽保無疆

遠遊篇

曹植

遠遊臨四海俯仰觀洪波大魚若曲陵承浪相經過靈
龜戴方丈神嶽儼嵒嵒我仙人翔其隅玉女戲其阿瓊蕊
可療饑仰首吸朝霞崑崙本吾宅中州非我家將歸謁
東父一舉超流沙鼓翼舞時風長嘯激清歌金石固易
敝日月同光華齊年與天地萬乘安足多

盤石篇

曹植

盤盤山巔石飄颻澗底蓬我本太山人何為客淮東兼
葭彌斥土林木無分重坼巖若崩缺湖水何洶洶蚌蛤
被濱涯光彩如錦虹高彼凌雲霄浮氣象螭龍鯨脊若
丘陵鬚若山上松呼吸吞船櫓澎湃戲中鴻方舟尋高
價珍寶麗以通一舉必千里乘颶舉帆幢經危履險阻
未知命所鍾常恐沈黃壚下與龜鼈同南極蒼梧野游
盼窮九江中夜指參辰欲師當定從仰天長嘆息思想

懷故邦乘桴何所志吁嗟我孔公

當牆欲高行

曹植

龍欲升天須浮雲人之仕進待中人衆口可以鑠金讒
言三至慈母不親憤憤俗間不辯偽真願欲披心自說
陳君門以九重道遠河無津

古今詩刪卷三

欽定四庫全書

古今詩刪卷四

明 李攀龍 編

晉樂府

惟漢行 傳玄

危哉鴻門會沛公幾不還輕裘入人軍投身湯火間兩
雄不俱立亞父見此權項莊奮劍起白刃何翩翩伯身
雖為蔽事促不及旋張良帽坐側高祖變龍顏賴得樊

將軍虎叱項王前，瞋目駭三軍。
磨牙咀豚肩，空庖讓霸主。
臨危吐奇言，威陵萬乘主。
指顧回泰山，神龍困鼎鑊。
非噲豈得全，狗屠登上將。
功業信有原，健兒實可慕。
腐儒安足嘆。

放歌行

傳玄

靈龜有枯甲，神龍有腐鱗。
人無千歲壽，存質空相因。
朝露尚移景，促哉水上塵。
丘冢如履綦，不識故與新。
高樹來悲風，松柏垂威神。
曠野何蕭條，顧望無生人。
但見狐

狸跡虎豹自成羣孤雛攀樹鳴離鳥何續紛愁子多哀
心塞耳不忍聞長嘯淚雨下太息氣成雲

明月篇

傅玄

皎皎明月光灼灼朝日暉昔為春蠶絲今為秋女衣丹
唇列素齒翠彩發蛾眉嬌子多好言歡合易為姿玉顏
盛有時秀色隨年衰常恐新間舊變故興細微浮萍本
無根非水將何依憂喜更相接樂極還自悲

從軍行

陸機

苦哉遠征人飄飄窮四遐南陟五嶺巔北戍長城阿谿
谷深無底崇山鬱嵯峨奮臂攀喬木振迹涉流沙隆暑
固已慘涼風嚴且苛夏條集鮮藻寒氷結衝波胡馬如
雲屯越旗亦星羅飛鋒無絕影鳴鏑自相和朝餐不免
胄夕息常負戈苦哉遠征人撫心悲如何

長安有狹邪行

陸機

伊洛有岐路岐路交朱輪輕蓋承華景騰步躡飛塵鳴
玉豈樸儒憑軾皆俊民烈心厲勁秋麗服鮮芳春余本

倦游客豪彥多舊親傾蓋承芳訊欲鳴當及晨守一不
足矜歧路良可遵規行無曠迹矩步豈逮人投足緒已
爾四時不必循將遂殊塗軌要子同歸津

門有車馬客行

陸機

門有車馬客駕言發故鄉念君久不歸濡跡涉江湘投
袂赴門塗攬衣不及裳拊膺攜客泣掩淚敘溫涼借問
邦族間惻愴論存亡親友多零落舊齒皆彫喪市朝互
遷易城闕或丘荒墳壠日月多松柏鬱芒芒天道信崇

替人生安得長慷慨惟平生俛仰獨悲傷

猛虎行

陸機

渴不飲盜泉水熱不息惡木陰惡木豈無枝志士多苦
心整駕肅時命杖策將遠尋飢食猛虎窟寒棲野雀林
日歸功未建時往歲載陰崇雲臨岸駭鳴條隨風吟靜
言幽谷底長嘯高山岑急絃無懦響亮節難為音人生
誠未易曷云開此衿眷我耿介懷俯仰愧古今

懊儂歌

綠珠

絲布濕難縫令儂十指穿黃牛細犢車遊戲出孟津

扶風歌

劉琨

朝發廣莫門暮宿丹水山左手彎繁弱右手揮龍淵顧
瞻望宮闕俯仰御飛軒據鞍長歎息淚下如流泉繫馬
長松下發鞍高岳頭烈烈悲風起泠泠澗水流揮手長
相謝哽咽不能言浮雲為我結歸鳥為我旋去家日已
遠安知存與亡慷慨窮林中抱膝獨摧藏麋鹿游我前
猿猴戲我側資糧既乏盡薇蕨安可食攬轡命徒侶吟

嘯絕巖中君子道微矣夫子故有窮惟昔李騫期寄在
匈奴庭忠信反獲罪漢武不見明我欲竟此曲此曲悲
且長棄置勿重陳重陳令心傷

獨漉篇

無名氏

獨漉獨漉水深泥濁泥濁尚可水深殺我雍雍雙鴈游
戲田畔我欲射鴈念子孤散翩翩浮萍得風搖輕我心
和合與之同并空牀低帷誰知無人夜衣錦繡誰別偽
真刀鳴箭中倚牀無施父冤不報欲活何為猛虎斑斑

游戲山間虎欲齧人不避豪賢

子夜歌九首

無名氏

芳是香所為冶容不敢當天不奪人願故使儂見郎

其二

宿昔不梳頭絲髮披兩肩婉伸郎膝下何處不可憐

其三

今日已歡別合會在何時明燈照空局悠然未有期

其四

擎枕北牕臥郎來就儂嬉小喜多唐突相憐能幾時

其五

郎為傍人取負儂非一事攤門不安橫無復相關意

其六

擎裾未結帶約眉出前牕羅裳易飄颻小開罵春風

其七

歡從何處來端然有憂色三喚不一應有何比松栢

其八

我念歡的的子行由豫情霧露隱芙蓉見蓮不分明

其九

恃愛如欲進含羞未肯前朱口發豔歌玉指弄嬌絃

子夜四時歌

春歌四首

無名氏

光風流月初新林錦花舒情人戲春月窈窕曳羅裾

其二

碧樓暝初月羅綺垂新風含香未及歌桂酒發清容

其三

春林花多媚春鳥意多哀
春風復多情吹我羅裳開

其四

明月照桂林初花錦繡色
誰能不相思獨在機中織

夏歌四首

無名氏

高堂不作壁招取四面風
吹歡羅裳開動儂含芙蓉

其二

反覆華簾上屏帳了不施
郎君未可前待我整容儀

其三

情知三夏熱今日偏獨甚香巾拂玉席共郎登樓寢

其四

輕衣不重綵颼風故不涼三伏何時過許儂紅粉妝

秋歌三首

無名氏

開牕秋月光滅燭解羅裳含笑帷幌裏舉體蘭蕙香

其二

初寒八九月獨纏自絡絲寒衣尚未了郎喚儂底為

其三

秋風入牕裏羅帳起飄颻仰頭看明月寄情千里光

冬歌三首

無名氏

淵水厚三尺素雪覆千里我心如松柏君情復何似

其二

寒鳥依高樹枯木鳴悲風為歡顛顛盡那得好顏容

其三

躡履步荒林蕭條悲人情一唱泰始樂枯草銜花生

歡聞歌

無名氏

遙遙天無柱流飄萍無根單身如熒火持底報郎恩

歡聞變歌二首

無名氏

鏤臂飲清血牛羊持祭天沒命成灰土終不罷相憐

其二

駛風何曜曜帆上牛渚磯帆作繖子張船如侶馬馳

前溪歌二首

無名氏

黃葛生爛漫誰能斷葛根寧斷嬌兒乳不斷郎殷勤

其二

黃葛結蒙龍生在洛溪邊
花落逐水去何當順流還還
亦不復鮮

黃生曲

無名氏

松栢葉青
倩石榴花
歲時
迳置前後事
歡今定憐誰

黃鵠曲四首

無名氏

黃鵠參天飛
半道鬱徘徊
腹中車輪轉
君知思憶誰

其二

黃鵠參天飛半道還哀鳴三年失羣侶生離傷人情

其三

黃鵠參天飛凝融爭風回高翔入玄闕時復乘雲頽

其四

黃鵠參天飛半道還後渚欲飛不復飛悲鳴覓羣侶

長樂佳

無名氏

小庭春映日四角佩琳琅玉枕龍鬚席郎暝首何當

懊儂歌三首

無名氏

江陵去揚州三千三百里已行一千三所有二千在

其二

長檣鐵鹿子布帆阿那起詫儂安在間一去三千里

其三

懊惱奈何許夜聞家中論不得儂與汝

闕

黃竹子歌

無名氏

江邊黃竹子堪作女兒箱一船使兩槳得娘還故鄉

聖郎曲

無名氏

左亦不佯佯右亦不翼翼仙人在郎傍玉女在郎側酒
無沙糖味為他通顏色

嬌女詩二曲

無名氏

北遊臨河海遙望中菰菱芙蓉發盛華淥水清且澄絃
歌奏聲節髣髴有餘哀

其二

蹀躞越橋上河水東西流上有神仙居下有西流魚行
不獨自去三三兩兩俱

三洲歌三曲

無名氏

送歡板橋灣相待三山頭遙見千幅帆知是逐風流

其二

風流不暫停三山隱行舟願作比目魚隨歡千里遊

其三

湘東醺醪酒廣州龍頭鑄玉尊金鏤碗與郎雙杯行

江陵樂二曲

無名氏

不復出場戲毆場生青草試作兩三回毆場方就好

其二

陽春二三月相將蹋百草逢人駐步看揚聲皆言好

來羅四曲

無名氏

鬱金黃花標下有同心草草生日已長人生日就老

其二

君子防未然莫近嫌疑邊瓜田不躡履李下不整冠

其三

故人何怨新切少必求多此事何足道聽我歌來羅

其四

白頭不忍死心愁皆教然遊戲太始世一日當千年

那呵灘六曲

無名氏

我去只如還終不在道邊我若在這邊良信寄書還

其二

松江引百丈一濡多一艇上水郎擔篙何時至江陵

其三

江陵三千三何足持作遠書疏數知聞莫令信使斷

其四

聞歡下揚州相送江津灣願得篙櫓折教郎到頭還

其五

篙折當更覓櫓折當更安各自是官人那得到頭還

其六

百思纏中心願為所歡與子結終始誓約在金蘭

孟珠三首

無名氏

人言孟珠富信實金滿堂龍頭銜九花玉釵明月璫

其二

陽春二三月草與水同色攀條摘香花言是歡氣息

其三

可憐景陽山岌岌百尺樓上有明天子麟鳳戲中州

翳樂三曲

無名氏

人生歡愛時少年新得意一旦不相見輒作煩冤思

其二

陽春二三月相將舞翳樂曲曲隨時變持許豔郎目

其三

人言揚州樂揚州信自樂總角諸少年歌舞自相逐

雙行纏二曲

無名氏

朱絲繫腕繩真如白雪凝非但我言好衆情共所稱

其二

新羅繡行纏足趺如春妍他人不言好獨我知可憐

黃督二曲

無名氏

喬客他鄉人三春不得歸願看楊柳樹已復藏斑駁

其二

籠車度謁衍故人求寄載催牛閉後戶無預故人事

白符鳩

無名氏

石頭龍尾灣新亭送客渚酤酒不取錢郎能飲幾許

折楊柳四月歌

無名氏

芙蓉始懷蓮何處覓同心俱生世尊前折楊柳捻香散
名花志得長相取

西洲曲

無名氏

憶梅下西洲折梅寄江北單衫杏子紅雙鬢鴉雛色西
州在何處兩漿橋頭渡日暮伯勞飛風吹烏白樹樹下
即門前門中露翠鈿開門郎不至出門採紅蓮採蓮南
塘秋蓮花過人頭低頭弄蓮子蓮子青如水置蓮懷袖
中蓮心徹底紅憶郎郎不至仰首望飛鴻鴻飛滿西洲
望郎上青樓樓高望不見盡日闌干頭闌干十二曲垂
手明如玉卷簾天自高海水搖空綠海水夢悠悠君愁
我亦愁南風知我意吹夢到西洲

長干曲

無名氏

逆浪故相邀，菱舟不怕搖。
妾家揚子住，便弄廣陵潮。

東飛伯勞歌


無名氏

東飛伯勞西飛燕，黃姑織女時相見。
誰家女兒對門居，開顏發豔照里閭。
南牕北牖挂月光，羅幃綺帳脂粉香。
女兒年紀十五六，窈窕無雙顏如玉。
三春已暮花從風，空留可憐誰與同。

樂辭

無名氏

繡幙圍香風耳節朱絲桐不知理何事淺立經營中愛
惜加窮袴防閑託守宮今日牛羊上丘壠當年近前面
發紅



古今詩刪卷四

欽定四庫全書

集部

古今詩刪卷五

六

詳校官中書_臣李采

侍讀_臣孫球覆勘

總校官無吉士_臣倉聖脉

校對官待詔_臣胡士震

謄錄監生_臣莊承蕃

欽定四庫全書

古今詩刪卷五

明 李攀龍 編

宋樂府

丁督護歌

孝武帝

督護北征去相送落星墟
帆檣如芒櫓督護今何渠

代放歌行

鮑照

夢蟲避葵堇習苦不言非
小人自齷齪安知曠士懷雞

鳴洛城裏禁門平旦開冠蓋縱橫至車騎四方來素帶
曳長飈華纓結遠埃日中安能止鐘鳴猶未歸夷世不
可逢賢君信愛才明慮自天斷不受外嫌猜一言分珪
爵片善辭草萊豈伊白璧賜將起黃金臺今君有何疾
臨路獨遲迴

出自薊北門行

鮑照

羽檄起邊亭烽火入咸陽徵師屯廣武分兵救朔方嚴
秋筋竿勁虜陣精且強天子按劍怒使者遙相望鴈行

緣石徑魚貫度飛梁
簫鼓流漢颶旌甲被胡霜
疾風衝塞起沙礫
自飄揚馬毛縮如蝟
角弓不可張時危見臣
節世亂識忠良
投軀報明主身死為國殤

代結客少年場行

鮑照

驄馬金絡頭錦帶佩吳鉤
失意杯酒間白刃起相讐
追兵一旦至負劒遠行遊
去鄉三十載復得還舊丘
升高臨四關表裏望皇州
九塗平若水雙闕似雲浮
扶宮羅將相夾道列王侯
日中市朝滿車馬若川流
擊鐘陳鼎

欽定四庫全書

古今詩冊
卷五

二

食方駕自相求今我獨何為
埽壤懷百憂

中興歌

鮑照

襄陽是小地壽陽非帝城
今日中興樂遙冶在上京

胡笳曲

吳邁遠

輕命重意氣古來豈但今
緩頰獻一說揚眉受千金
邊風落寒草鳴笳墜飛禽
越情結楚思漢耳聽胡音
既懷離俗傷復悲朝光侵
日當故鄉沒遙見浮雲陰

江南思

湯惠休

幽客海陰路留戍淮陽津垂情向春草知是故鄉人

讀曲歌七首

無名氏

花釵芙蓉髻雙鬢如浮雲春風不知著好來動羅裙

其二

念子情難有已惡動羅裙聽儂人懷不

闕

其三

娑拖何處歸道逢描搭郎口朱脫去盡花釵復低昂

其四

合冥過藩來向曉開門去歡取身上好不為儂作慮

其五

含笑來向儂一抱不能置領後千里帶那煩誰多媚

其六

暫出白門前楊柳可藏烏歡作沈水香儂作博山鑪

其七

閨閣斷信使的的兩相憶譬如水上影分明不可得

莫愁樂

無名氏

聞歡下揚州相送楚山頭探手抱腰看江水斷不流

襄陽樂三首

無名氏

江陵三千三百塞陌中央但問相隨不何計道里長

其二

人言襄陽樂樂作非儂處乘星冒風流還儂揚州去

其三

揚州蒲鍛環百錢兩三叢不能買將還空手攬抱儂

西鳥夜飛

無名氏

日從東方出團團雞子黃夫婦恩情重憐歡故在傍

齊樂府

江臯曲

王融

林斷山更續洲盡江復開雲峰帝鄉起水源桐栢來

陽翟新聲

王融

懷春發下蔡含笑向陽城恥為飛雉曲好作鷓鴣鳴

入朝曲

謝朓

江南佳麗地金陵帝王州逶迤帶綠水迢遞起朱樓飛

覺火馳道垂楊陰御溝凝笳翼高蓋疊鼓送華輶獻納
雲臺表功名良可收

王孫遊

謝朓

綠草蔓如絲雜樹紅英發無論君不歸君歸芳已歇

估客樂二首

釋寶月

大艖珂峨頭何處發揚州借問艖上郎見儂所歡不

其二

初發揚州時船出平津泊五兩如竹林何處相尋博

蘇小小歌

古辭

妾乘油壁車，郎騎青驄馬。
何處結同心？西陵松柏下。

梁樂府

夏歌二首

武帝

閨中花如繡，簾上露如珠。
欲知有所思，停織復踟躕。

其二

玉盤著朱李，金杯盛白酒。
雖欲持自親，復恐不甘口。

秋歌

武帝

繡帶合歡結錦衣連理大懷情
入夜月含笑出朝雲

白紵辭

武帝

纖腰嫋嫋不任衣嬌怨獨立特為誰
赴曲君前未忍歸
上聲急調中心飛

龍丘引

簡文帝

龍丘一回首楚路蒼無極
水照弄珠影雲吐陽臺色
浦
狹邨煙度洲長歸鳥息游蕩逐春心
空憐無羽翼

烏棲曲

簡文帝

織成屏風金屈膝朱唇玉面燈前出相看氣息望君憐
誰能含羞不自前

烏棲曲

元帝

沙棠作船桂作楫夜渡江南採蓮葉復值西施新浣沙
共向江干眺月華

襄陽蹋銅鞮歌

沈約

蹀躞飛塵起左右自生光男兒得富貴何必在歸鄉

起夜來

柳惲

城南斷車騎
閣道覆青埃
露華光翠網
月影入蘭臺
洞房且莫掩
應門或復開
颯颯秋桂響
非君起夜來

行行且游獵篇

劉孝威

之罘講射所
上林娛獵場
選徒驕楚客
召狩誇胡王
罽車已戒道
風鳥復起行
攸飛具殳繳
材官命蹶張
高置掩月兔
勁矢射天狼
蹠地不遑逸
排虛豈及翔
日暮勾陳轉
風清饒吹颺
歸來宴平樂
寧肯滯禽荒

行幸甘泉宮歌

劉孝威

漢家迎夏畢避暑甘泉宮棧車鳴里鼓駟馬駕相風校尉烏桓騎待制樓煩弓後旌猶五柞前茄度九峻才人豹尾內御酒屬車中輦迴百子閣扇動七輪風鳴鐘休衛士披圖召後宮材官促校獵涼秋戲射熊

陌上桑

王臺卿

鬱鬱陌上桑盈盈道傍女送君上河梁拭淚不能語

度關山

戴嵩

昔聽隴頭吟平居已流涕今上關山望長安樹如薺千

里非鄉邑四海皆兄弟軍中大體自相褒其間得意各
分曹博陵輕俠皆無位幽州重氣本多豪馬銜首宿葉
劍瑩鷺鸛膏初征心未習復值鴈飛入山頭看月近草
上知風急笛吹曲難成笳繫響還澁武帝初承平東伐
復西征薊門海作塹榆塞冰為城催令四校出倚望三
邊平箭服朝來動刀環臨陣鳴將軍一百戰都護五千
兵且決雄雌眼前利誰道功名身後事丈夫意氣本自
然來時辭第已聞天但令此身與命在不持烽火照甘

泉

歡聞歌

王金珠

艷艷金樓女心如玉池蓮持底報郎恩俱期遊梵天

鼓角橫吹曲辭

企喻歌二首

無名氏

前行看後行齊著鐵柄襠前頭看後頭齊著鐵鉅鉞

其二

男兒可憐蟲出門懷死憂尸喪狹谷中白骨無人收

瑯琊王歌辭三首

無名氏

新買五尺刀懸著中梁柱一日三摩娑劇於十五女

其二

快馬高纏鬃遙知身是龍誰能騎此馬唯有廣平公

其三

客行依主人願得主人彊猛虎依深山願得松栢長

紫騮馬歌辭二曲

無名氏

十五從軍征八十始得歸道逢鄉里人家中有阿誰

其二

遙看是君家松栢冢纍纍兔從狗竇入雉從梁上飛

黃淡思歌

無名氏

心中不能言腹作車輪旋與郎相知時但恐傍人聞

地驅樂歌二曲

無名氏

側側力力念君無極枕郎左臂隨郎轉側

其二

摩捋郎鬚看郎顏色郎不念女不可與力

隴頭流水歌三首

無名氏

隴頭流水流離西下念我一身飄然曠野

其二

西上隴阪羊腸九迴山高谷深不覺脚酸

其三

手扳弱枝足踰弱泥

闕

隴頭歌辭三首

無名氏

隴頭流水流離山下念吾一身飄然曠野

其二

朝發欣城暮宿隴頭寒不能語舌卷入喉

其三

隴頭流水鳴聲幽咽遙望秦川心腸斷絕

捉搦歌四曲

無名氏

粟穀難舂付石臼敝衣難護付巧婦男兒千凶飽人手
老女不嫁只生口

其二

誰家女子能行步反著袂禪後裙露天生男女共一處
願得兩箇成翁嫗

其三

華陰山頭百大井下有流水徹骨冷可憐女子能照影
不見其餘見斜領

其四

黃桑柘屐蒲子履中央有絲兩頭繫小時憐母大憐婿
何不早嫁論家計

折楊柳歌辭二曲

無名氏

遙看孟津河楊柳鬱娑娑我是虜家兒不解漢兒歌

其二

健兒須快馬快馬須健兒蹴跋黃塵下然後別雄雌

折楊柳枝歌

無名氏

問女何所思問女何所憶阿婆許嫁女今年無消息

幽州馬客吟歌辭二曲

無名氏

快馬常苦瘦勦兒常苦貧黃禾起羸馬有錢始作人

其二

南山自言高只與北山齊女兒自言好故入郎君懷

高陽樂人歌二曲

無名氏

可憐白鼻騮相將入酒家無錢但共飲畫地作交賒

其二

何處蝶觴來兩頰色如火自有桃花容莫言人勸我

陳樂府

玉樹後庭花

後主

麗宇芳林對高閣
新妝艷質本傾城
映戶凝嬌乍不進
出帷含笑復相迎
妖姬臉似花含露
玉樹流光照後庭

烏棲曲二首

徐陵

卓女紅妝期此夜
胡姬沽酒誰論價
風流荀令好兒郎
偏能傅粉復薰香

其二

繡帳羅帷隱燈燭
一夜千年猶不足
唯憎無賴汝南雞
天河未落猶爭啼

當壚曲 岑之敬

明月二八照花新
當壚十五晚留賓
回眸百萬橫自陳

北朝樂府

挾琴歌 魏收

春風宛轉八曲房
兼送小苑百花香
白馬金鞍去未返

紅妝玉筍下成行

勅勒歌 無名氏

勅勒川陰山下天
似穹廬籠蓋四野
天蒼蒼野茫茫風

吹草低見牛羊

烏夜啼

庾信

促柱繁絃非子夜
歌聲舞態異前溪
御史府中何處宿
洛陽城頭那得棲
彈琴蜀郡卓家女
織錦秦川竇氏妻
詎不自驚長淚落
到頭啼烏恒夜啼

古今詩刪卷五